

MR. MITO CROES A REPASA TRATAMENTONAN PA CAMBIO DI STATUUT

ORANJESTAD(AAN)—Durante un conferencia di prensa ayera Mr. Mito Croes di AVP, a duna un splicacion di e desarollonan na Hulanda, caminda el a representa AVP tanto como miembro di Staten di AVP y como e ex-ministro di Structura Estatal cu a prepara tur e cambionan estatal.

Segun M. Mito Croes a trece dilanti, loque a ser trata ta e dos proyecto nan di Rijkswet cu ta encera basicamente cu Aruba lo haya su status aparte y di dos proyecto encuantu algun regla transitorio pa haci posibel pa yega juridicamente na e Status Aparte aki.

El a haci uso tambe di e oportunidad pa trata algun otro topico pa AVP esta e Plan di rescate cu AVP ta traha ariba y otro.

Encuantu e Plan di Rescate el a menciona cu el a reuni cu representante nan di E.E.G. tanto na Bruselas y na Straatsburg ariba esaki pa mira kico nan ta mira como posibilidad cu por incorpora den e Plan di Rescate.

Awor aki practicamente e plan ta cla y esaki lo ser manda pa E.E.G. cu lo duna nan contribucion tambe.

Mr. Mito Croes a repasa e tratamentonan den 2e y 1e Kamer indicando cu e proyecto di cambio di Statuut ta esun cu a haya mas tanto atencion.

Hulanda no a pone mucho exigencia pa loque ta toca e areglonan cu mester bini entre Aruba y Antillas di 5 locual si nan tabata haci si den pasado.

Pa loque ta toca e cambio di Statuut Aruba a presenta tres amienda, etapa pone den e proyecto di ley e fecha di Status Aparte, e di dos tabata pa duna e conferencia di evaluacion un criterio mas amplio, y pa bini un plebiscito.

E tres amiendan a ser entrega unanimamente y tur fraccion di Staten presente y e miembro independiente Bob Lopez Henriquez a firma esaki.

Di e prome amienda encuantu ponemento di fecha di status aparte den ley, e punto di bista hulandes tabata cu tabata tin cierto factornan cu Hulanda no tin den man y cu ta imposibel pa mara e fecha aki den ley. Pesey Hulanda a haya dificil pa pone e fecha prome di januari 86 den e ley.

Hulanda su punto di vista ta y ta keda cu prome di januari status aparte mester drenta na vigor.

Lo ser manda un programa di tur cos cu mester tuma lugar pa yega na e fecha ey.

Mr. Mito Croes a laga sa cu el a trece dilanti cu na Aruba tin consenso caba pa Aruba tene eleccion na September y a haya como contesta cu no tin problema cu esey y den e programa esaki ta ser teni cuenta cune.

Locual a sorprende e delegacion di Aruba ta cu ora a muestra ariba e situacion dificil di Aruba, e contesta haya di de Koning ta cu mester mira e situacion di Aruba realistico, y nan a mira e asunto di Lago ta bini algun aña caba. "Cu otro palabra Gobierno tabata na altura algun aña prome cu Lago ta bay cera," el a laga sa.

Hulanda ta tene cuenta cu Aruba a haya e chance pa prepara su mes pa e baida di Lago, Mr. Mito Croes a trece dilanti.

Encuantu e segundo amienda, ariba evaluacion amplio despues di fecha di Status Aparte a haya e

sorpresa ora cu Sr. Betico Croes sin consulta cu ningun hende di e delegacion a dicidi di retira su sosten na e amienda.

El a bisa cu ta importante pa menciona cu tabata tin palabracion cu lo haci e convenio hunto, pero Sr. Croes di un momento pa otro a cambia di opinion y ta bin cu un opinion completamente nobo dilanti sin consulta esnan hunto cune. El a bay mas leeuw y ademas di retira su sosten a bin cu un mocion cu ta encera exactamente loque e hulandesnan a bisa contra e amienda.

Tur a vota pa opinion di Sr. Croes cu tabata e opinion cu Hulanda a trece dilanti for di cumenzamento caba, y esaki a debilita e posicion di Aruba enormemente pasobra di parti di Hulanda a ripara cu Aruba no tabata tin consenso mas.

AVP mes a entrega e amienda di nobo cu sosten di Nisbet y Lopez Henriquez, pero e amienda e ora ey no a alcanza mayora. E di tres amienda encuantu consultacion cu pueblo pa e mes motibo menciona ariba a ser rechaza tambe, esta cu e no a haya mayoria.

Segun Mr. Mito Croes, den 1e Kamer Aruba a haya mas sosten ora cu a ser treci dilanti cu Hulanda no por mara e fecha di Status Aparte na e fecha di independencia.

Esaki ta dos cos separa y Hulanda lo no por interpretar pa Aruba kico ta e derecho di autodeterminacion di Aruba pasobra esaki ta algo cu Aruba mes mester interpreta.

Mr. Boy Hernandez, a trece dilanti usando e interpretacion di prof. Kapteyn, el a sostene e punto di vista di AVP.

Segun Mr. Mito Croes, e caminda cu tin pa cana awor cu e proyecto a ser acepta den e dos camaranan di Hulanda, Eilandsraad y Staten mester dumanan aprobacion ainda pa e cambionan di Statuut bira ley.

RUBRICA MEDICO

DOLOR DI CABEZ 2

Siman pasa nos a trata e tipo di dolor di cabez cu por wordo califica como esun di mas comun, esta dolor di cabez pa motibo di tension.

Den otro casonan, dolor di cabez na mas di mitar di e oportunidadnan, ta wordo ocasiona pa un enfermedad di infeccion. E dolor di cabez aki ta bay acompaña cu keintura y na momento cu e keintura pasa, tambe e dolor di cabez ta desaparece. Especialmente ora ta trata di un infeccion di virus, e dolor di cabez ta pronuncia ora tin hopi luz. Den un cantidad limita di casonan, den cual den un tempo relativamente cortico, un dolor fuerte di cabez ta desaroya cu falta di sentido y keintura alto, cu ta bira peor ora bo sinta cu bo pianan gerek, y bo ta haya dolor si bo trata di pone bo cachete ariba bo pecho, tin un posibilidad cu bo ta sufri di asina yama hersenvliesontsteking.

Den tal caso, bo mester acerca un medico di biaha. E mes caso por presenta sin keintura, y lo bo tin e sentido cu bo ta haya un golpe ariba bo cabez.

Esey ta indica cu bo por tin un derame den bo hersenvlies, esta un asina yama derame subarahnoidal. Den e caso aki tambe mester avisa medico di biaha.

Algo cu ta produci dolor di cabez tambe den un cantidad di caso, ta huma hopi. Hopi bez e ta bay acompaña cu puntanan preto cu ta bolter dilanti nos wowo y esey ta indica ariba un intoxicacion di e cerebro cu nicotina.

Despues di consumo di alcohol, tambe un persona por wordo confronta cu dolor di cabez, cu di un parti ta consecuencia di un intoxicacion di e cerebro, pero tambe di un falta di awa den curpa, cu ta wordo causa pa alcohol, cu ta paraliza un parti especial di e cerebro, cu ta produci un materia cu ta haci e niernan retene awa. Falta di e materia aki ta permiti e curpa perde demasiado awa,

Esnan cu ta consumi hopi alcohol y mester aparece na trabao e dia siguiente, aunque nan lo no por traha naturalmente, mester ta conciente cu bebe hopi awa despues di demasiado uso di alcohol, por evita dolor di cabez e dia siguiente.

Hopi suco den urina por ejemplo den caso di diabetes ta haci tambe cu e niernan ta perde hopi awa, cu ta wordo usa pa elimina e grado demasiado alto di suco. Esey ta un di e motibonan cu diabeticonan ta sufri di dolor di cabez. Ademas den caso di diabetis tin menos suco den e celnan di cerebro loke ta produci dolor di cabez.

Den caso di anemia dolor di cabez ta wordo produci pa e hecho cu e sanger no ta capaz pa produci suficiente oxigeno pa e cerebro.

Problemanan cu vista, esta e hecho cu nos no ta mira bon na distancia o cerca, ta produci dolor di cabez, especialmente si nos fija nos vista pa un tempo prolonga. Si bo ta pensa cu bo ta pensa di e tipo di dolor di cabez aki trata di usa un bril di un otro persona y wak si bo por mira mas detaye ora bo fija den distancia. Si esaki ta e caso, no necesariamente e bril di otro persona ta esun cu bo mester, pero si e ta muestra cu bo mester realiza un bishita na un dokter.

Otro siman nos lo trata e ultimo tres motibonan di dolor di cabez.



TA BENDE
*** BOLIVAR***
(14.50 pa 100)

na:
King International Casino
HOLIDAY INN
TUR DIA
for di 10'or a.m. te cu
4'or p.m.